



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
30 Outubru 2015
Parlamentu Nasionál

JSMP apresia Parlamentu Nasionál kolabora ho Justisa

Iha 27 Outobru 2015, Parlamentu Nasionál (PN) liuhusi reuniaun plenária halo levantamentu imunidade ba Deputada Maria Fernanda Lay bazeia ba pedidu husi tribunál hodi presta depoimentu iha tribunál ba kazu partisipasaun ekonomia ho administrasaun danoza ne'ebé involve arguida Eis-Ministra Finansas, Emilia Pires ho Eis-vise-Ministra Saude, Magdalena Hanjan.

“JSMP kongratula no apresia tebes PN nia vontade di'ak hodi hasai imunidade deputada ne'e hodi bele kolabora ho ordem tribunal. Ne'e pasu ida ne'e positivu tebes ba ita nia sistema estado-de-direitu no ordem konstituisional seluk,” dehan Diretór Ezekutivu JSMP, Luis de Oliveira Sampaio”.

JSMP hanoin katak levantamentu ba imunidade deputada nian ne'e mós reflète Artigu 8 (4) Rejimentu Parlamentár atu asegura prosesu justisa no kolabora ho tribunál.

Durante diskusaun ba prosesu levantermentu ne'e, deputadu Fretilin Aniceto G. Lopes kestiona no konsidera katak depoimentu ne'ebé deputada sei hato'o ba tribunál hanesan titular estadu ne'e abstratu no sei la prodús provas ruma hodi reforsa provas Ministériu Públiku (MP) nian no bele hakman arguida sira, tambá ne'e la presija atu ba hatan iha tribunál. Entertantu deputadu CNRT Natalino do Santos defende katak ne'e direitu hanesan arguida ida atu hatudu ema hodi fo testamuña kona-ba faktus ruma iha tribunál no ita tenki kaer metin no respeita ba prinsipiu presumsaun inosente tanba prosesu sei lao hela seidauk iha desizaun finál husi tribunal.

Embora iha kontraversiu entre deputadu sira relasiona ho levantamentu imunidade ne'e, maibe ikus-mai plenariu ne'e hala'o duni votasaun sekretu ho rezultdu pasa ho votus afavór 28, kontra 19, abstensaun 2 no votu branku 1 husi total deputadu 52.

JSMP hanoin katak kualker individu ruma ne'ebé hasoru prosesu justisa tenke hetan tratamentu igual tuir lei no konstituisaun haruka no tenke nafatin konsidera inosente too tribunal halo desizaun finál. Ne'e signífika katak arguida ka arguidu sira iha direitu lejítimu atu lori testemuña sira ba tribunál ba interese defeza ida ne'ebé adekuada ba sira nia interese legál.

Rua setubal, Colmera, Dili Timor Leste
PoBox: 275

Telefone: 3323883 | 77295795

info@jsmp.minihub.org

www.jsmp.tl

Facebook: www.facebook.com/timorleste.jsmp

Twitter: @JSMPtl

JSMP mós hanoín katak tribunál tenke sai fatin ne'ebé dignu, kredível no konfortavel ba ema hotu atu defende sira nia direitu inklui sira ne'ebé hetan akuzasaun. Ida-ne'e importante atu hametin sosiedade nia konfiansa ba setór justisa formal. So hanesan ne'e deit mak ema hotu sei la-sente presaun no tauk atu ba hatan iha tribunál.

JSMP espera katak ho prezena no depoimentu deputada Maria Fernanda Lay bele fornese faktus adisional ba tribunál atu asegura prinsípiu kona-ba julgamentu justu katak ema hotu iha direitu ba defeza ida ne'ebé adekuaudu no desizaun ne'ebé justu ba parte hotu.

Atu hetan informasaun kle'an liu tan favor kontaktu:

Luis de Oliveira Sampaio
Diretór Ezekutivu JSMP
Email: luis@jsmp.minihub.org